

Sur canoni prof. dr. Benedetg Giger

Autor(en): **Monn, Christian**

Objekttyp: **Obituary**

Zeitschrift: **Igl Ischi : organ della Romania (Societat de Students Romontschs)**

Band (Jahr): **52 (1966)**

PDF erstellt am: **09.08.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.


Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

SUR CANONI PROF. DR. BENEDETG GIGER

DA SUR PROF. CHRISTIAN MONN



CAN. DR. BENEDETG GIGER

Sur Benedetg Giger ei naschius la fiasta de sogn Benedetg, ils 21 de mars 1907 a Curaglia. Suenter la scola primara dil vitg nativ, frequenta el il gimnasi dils benedictins a Mustér ed Engelberg. El serenda silsuenter el seminari de spirituals a

Cuera per entscheiver ses studis teologics. 1931 astga Sur Benedetg Giger celebrar sia messa nuviala a Curaglia. All'universitad de Turitg studegia el filologia classica e concluda 1937 ses studis cun il doctorat. Silsuenther vegn Sur Benedetg Giger clamaus da msgr. uestg Georgius Schmid de Grüneck el collegi de «Nossadunna digl Agid» a Sviz. Dapi lu ha el surviu leu alla diocesa de Cuera sco professor e dapi 1941 sco prefect dils studis entochen sia mort ils 20 de schaner 1966.

Sur Benedetg Giger ei staus in um della Baselia ed in um della scola. Egl Ischi descha ei denton d'oravontut seregurdar dils merets che prof. Giger ha acquistau per la cultura romontscha. Ina buna introducziun en quei tema porschan entginas strofas ord ina dellas paucas poesias dil permiert, intitulada «Per l'entschatta digl onn de scola».

Jeu sundel lunsch naven da casa,
Treis meins, quei ei schi ditg, schi ditg!
Miu spért bein sgola cun tristezia
Savens si en miu car bi vitg.

Mo va naven cun talas tschontschas,
Jeu stun bugen leu nu' ch'jeu sun,
Dieus e la steila de ventira
Han mei menau ord miu Grischun.

Per quei lavur'jeu cun curascha
Sin Dieus en tschiel sefidond.
El meina mei sin buna via
Legria en miu cor plantond.

Mo mia patria e faviala
Sai jeu cert maina emblidar,
Romontsch, Tei, cara viarva biala
Vi er egl jester cultivar.

Buca che Sur Benedetg fuss daventaus in poet cun quellas semplas remas alternontas! El sez stuess segir rir de bien cor, sch'el udess sia poesia casuala. Quella ei denton in muossavia per siu avegnir e cuntegn las directivas per siu operar futur en favur della cultura romontscha.

Oravontut la davosa strofa ei significonta: «Romontsch, Tei, cara viarva biala vi er egl jester cultivar». A quella devisa ei Sur Benedetg Giger staus fideivels ina veta entira. Siu camp de lavur ei adina staus ordeifer igl intschess romontsch, mo era egl jester ha el cultivau cun gronda premura e carezia sia biala viarva materna.

En emprema lingia ei Sur Benedetg Giger staus in augsegner d'oraziun e d'exempel religios. Sco professor saveva el captivar ed entusiasmar ses scolars per il latin e grec e per las ideas humanisticas cuntenidas en quels texts classics. El steva bugen en «siu» collegi als peis dil Mythen, nua ch'el haveva ina missiun fetg impurtonta sco prefect dils studis. Onn per onn haveva el ina lavur immensa cun cumbinar ils uraris per ina scola aschi gronda. Mo quella vasta incumbensa impedeva buca prof. Giger de s'occupar della caussa romontscha. Sia patria era tuttina la Val dil Lucmagn e siu Grischun. A quella patria e cuntrada eis el restaus attaschus e fideivels entochen ils 24 de schaner 1966, nua ch'in imposant conduct de bara ha accumpignau el sin santeri a Platta. La fideivladad alla patria ed alla sauna tradiziun eran vertids caracteristicas de Sur Benedetg.

Siu aug, Sur prof. Augustin Giger, haveva refundau igl onn 1917 l'*academia romontscha* per ils students romontschs el collegi de Sviz. Sur Benedetg Giger ha surpriu quella cara ierta e promoviu ella cun anim e success duront varga 25 onns sco fideivel protectur. En quei interval eis ei reussiu ad el de procurar — per gronda part sin agens cuosts — per ina mudesta biblioteca romontscha. En numerusas sentupadas el ravugl dell'*academia romontscha* ha Sur Benedetg cun referats e discussiuns empruau de svegliar igl interess dils giuvens students romontschs per lur beins spirtals. Sia gronda prestaziun culturala per nus Romontschs ei senza dubi d'encurir sin quei camp de lavur, schegie ch'el ha era schiglioc fatg gronds survetschs a siu pievel grischun. Sia translaziun dil «*Cudisch de suandar Kristus*» ei stau in bi schenghetg al pievel catolic. Quel ei cumparius ella collecziun «*Sursum corda*», edida da Sur dr. Carli Fry, siu bien amitg sil crest d'Acladira. Sur Benedetg Giger scriveva buca mo per ch'ei seigi scret, mobein per alzar ils cors — *sursum corda* — de siu car pievel. Perquei gidava el era bugen ella pastoraziun, suandont siu aug Sur Paulin, in valent predicatur. Sco protectur dell'*academia* ha el scret beinenqual arte-

chel ella revista «Grüsse aus Maria Hilf» cun il tetel «La pagina romontscha». Mo era ella Gasetta Romontscha ed en autras periodicas ein cumparidas inaga ni l'otra lavurs ord sia plema. Il meret il pli grond per nossa cultura romontscha ha el denton acquistau cun siu contact persunal cun ils students romontschs «egl jester». Buca cun tractats scientifics, mobein entras quei contact persunal ha el dau vinavon oralmein la megliera tradiziun romontscha. Quella intermediaziun directa cun sia spontanadad e cun la forza de sia persunalitad marcanta, ha purtau dubel fretg. A quei operar el tschelau ha la Romontschia d'engraziar ina entira partida forzas activas.

Forsa gest perquei che Sur Benedetg Giger haveva sentiu quella encarschadetgna «lunsch naven da casa», saveva el consolar aschi bein quels che vegnevan tier el. El saveva far curascha e menar els puspei in pass vinavon. E Sur Benedetg haveva propi bien quitau per ses Romontschs, aschia che bein enqual vegn a restar engrazieivels ad el per tut igl agid spirtal e material.

Nies Sur professor era da tgau entochen pei, en tut siu far e demandar romontschs. Buca per nuot senumnavo el era tier ils Tudestgs «Benedetsch». El sedeva neu sco el era e leva era mantener ses students tenor lur natira e cultura.

Inaga ha el raquintau a mi il sequent: Ils emprems onns dil gimnasi a Mustér hagian els stuiu far in concept cun il tetel «Tgei utschi plai a mi il meglier?» El hagi elegiu sco utschi preferiu il pasler! Igl utschi il pli usitau ed ordinari! Quei para a mi enzatgei fetg tipic per Sur Benedetg. Igl usitau era sia forza. Per igl usitau della veta culturala de nies pievel haveva el senn, respect ed admiraziun. En raschienis cun ses purs de Medel haveva el empriu sco paucs las expressiuns de quella veta muntagnarda e cheutras era la sabientscha e las valurs profundas de quels tips sempels ed originals el meglier senn dil plaid. Siu saun humor combinava bugen expressiuns purilas cun la veta de scola. Aschia scheva el adina, cura ch'el fageva empristar in cudisch: «Sche ti drovas lu inaga la mugia, sche sas ti schon ver ella!» E cura ch'el survegneva in bien magnuc caura giu da Medel, lu era l'atmosfera cheu per ina fiasta «culturala» cun ses amitgs e collegas. Cultura vul dir cultivar entras enconuscher e formar la natira. A sia natira ed ella natira de sia patria ei Sur canoni staus fideivels. El ei staus sin in post

exponiu ed ha era astgau cultivar in bi diember della elita romontscha. L'elita ei denton buca adina la schinumnada intelligenza, mobein quels cun la noblezia dil cor. Sur Benedetg era spiritual e saveva che la finamira dil carstgaun ei buca mo la cultura, mobein il salit. Per quei salit eis el era staus prompts de purtar sacrificis quotidianis ed il grond sacrifici de sia veta.

Sur Benedetg Giger resta per nus Romontschs ella patria ed egl jester in exempel. Possien ils ideals ch'el ha apprezzau ed empruau de plantar ella giuventetgna, crescher e purtar reha raccolta.

La Punt romana

Veglia punt leu sut Curaglia
Sur il ramuront Rein miez,
Ferm tschentada sin greppaglia,
Audas ti gia il tuchiez
Della petschna val montana,
Vesas ses robusts affons
Duamelli onns.

Sche raquenta contas gadas
Gia passavan sur tei vi
Retgs e precis cun roschadas
Arrivond dal cauld miezdi;
Han giu ella blaua buola
La carpeggia siglientau
Cun lur pass marcau.

Plaida dellas nauschas lutgas
Dils Romans cun ils vegls Rets,
Co quels suenter liungas trutgas,
Garmaschia en lur pèz
Rumpan en la veglia Cuera
Per finalmein setschentar,
L'evla si plantar.